

A squadra di Voce Ventu

Sei giuvanotti asgiati
Cù una passione tamanta
Per i canti indiati
A leva di u settanta
À issa terra arradicati
Guasi cum'è arba santa.
Sè vo sete d'accunsentu
Secondu a tradizione
Hè venutu lu mumentu
Di fà e presentazione
Attenti à e piulate
È i colpi di bastone.

U primu hè capirasciatu
Quant'è sarre di Niolu
U purtevule appiccatu
È a chitarra à u colu
Longu longu sfilanciatu
Cum'è un palu di fasgiolu.
Minguli in quantità
Note ne ghjoca à miliò

U secondu hè verità
Pussede l'arte maiò
Cugnome s'ellu ùn nè hà
U chjamaremu « Django ».
In fatti d'animazione

U terzu si ferma mutu
L'accade à l'occasione
D'ùn esse micca vinutu
Mandendu per spiegazione
Un chjavellu ribattutu.

R : Ghjè avà ch'à noi tocca

Semu in cerca di talentu
Basta ch'omu apri la bocca
Diventa un veru
Scumpientu
Eccuti a filastrocca
Di a squadra Voce Ventu.

Incù a so bella cesta
Pelle mora i tratti fini
Ne face girà a testa
À e zitelle aiaccine
Ma li piace ancu à fà festa
È pigliassi e briachine.

L'altru chjappa li terzetti
Spezzanu li tempurali
Schiattanu toni è saetti
È fughjanu l'animali
I culombi, li falchetti
A volpe incù li cignali.

Forse u più cunnisciutu
Di scurdammine ùn possu
Dumanderete l'aiutu
Quand'ellu vi casca addossu
S'ellu sorte à lu prisuttu
Ùn vi lascia mancu l'ossu.

R : Ghjè avà ch'à noi tocca
Semu in cerca di talentu
Basta ch'omu apri la bocca
Diventa un veru
Scumpientu

Eccuti a filastrocca
Di a squadra Voce Ventu.

A friscura sittembrina
Ammatta i suleoni

Hè finita l'estatina
È compie sò e canzone
Accozzanu in cantina
Centunai di milioni.

D'avè vistu mi ramentu
Un magnificu tesoru
U si sparte Voce Ventu
U fruttu di issu lavoru
Nutendu mezu à l'argentu
Cù e stacche piene d'oru.
Spergu ùn ci serà ferita
Postu chì nimu si lagna
Issa canzona hè finita
È lu mio estru muntagna
Forse l'avete capita...
Ghjera solu una macagna.

R :Ghjè avà ch'à noi tocca
Semu in cerca di talentu
Basta ch'omu apri la bocca
Diventa unveru
Scumpientu

Eccuti a filastrocca
Di a squadra Voce Ventu.
Eccuti a filastrocca
Di a squadra Voce Ventu.
Eccuti a filastrocca
Di a squadra Voce Ventu.